

26 SEP 1998

Wartawan

WARTAWAN ASING JANGAN LAPORKAN BERITA TIDAK BENAR

KUALA LUMPUR, 26 Sept (Bernama) -- Wartawan dan wakil agensi berita asing hendaklah berhenti melaporkan berita tidak benar kepada masyarakat antarabangsa, tentang negara ini.

Presiden Persatuan Wartawan Melayu Malaysia (PWM) Yazid Othman berkata PWM merasa dukacita dengan media asing yang bersikap "buta mata" dan "pekak telinga" terhadap isu-isu tertentu di Malaysia, khususnya isu pemecatan Datuk Seri Anwar Ibrahim daripada Kabinet dan UMNO.

Dalam satu kenyataan di sini hari ini beliau berkata wartawan asing lebih percaya ucapan penentang kerajaan daripada kenyataan rasmi kerajaan dan Perdana Menteri Datuk Seri Dr Mahathir Mohamad sendiri.

Katanya bagi media asing jika ada perhimpunan, maka mereka itu kononnya menentang Perdana Menteri, sedangkan pada realitinya yang menyokong kerajaan lebih ramai daripada yang menentang.

Selain itu, komentar oleh beberapa individu yang mereka tulis seolah-olah menggambarkan kesemua rakyat Malaysia mengkritik kerajaan.

"Lupakah mereka dengan etika kewartawanan sehingga mereka tergamak membuat laporan berat sebelah, membohongi masyarakat dunia dengan berita sensasi yang palsu," katanya.

Katanya laporan-laporan yang dibuat oleh media asing mengenai politik negara akhir-akhir ini seolah-olah mereka tidak jelas dengan apa yang berlaku di negara ini.

--BERNAMA

MT RI